

KIRBEPREDIGT 2016

Guten Abend, liebe Leut' von Benningen.

Ihr müsset Eure Lauscher jetzt komplett aufdreh'n weil:

Nach 4 Tag Andacht isch des Pfarrers Gosche
zwar völlig ausg'franst, aber no net ganz verlosche.

Trotz alledem, Ihr kommet net drom nom
om mein Wortschwall, mal wieder ohne Maul-Kondom.

Zwei-Sechzehn dahanne ond drauße en dr Welt
kriaget Ihr unverblümt jetzt von mir nacherzählt.

Wirklich leicht fällt's des Jahr ned so richtig,
sprachlos macht vieles, wo war g'wäse ganz arg wichtig.

Terror, Krieg und wo de naglotzsch enorm viel Hass, des isch krass
ond macht in dr Summe ned allzu viel Spaß.

Angekommen isch des alles in onsrer guata alte Welt,
ach, war des schee, als es bloß gange isch oms schnöde blöde Geld.

Inzwischen geh'n sich fascht alle wäge nix ond wieder nix an dr Krage,
mr moimt, Friedliebende hend bald gar nix meh zom sage.

Omzingelt send mr von Verrückte ond Despote,
isch des surreal oder send des totalitäre Vorbote?

Em Weschte hetzt des Trump-el-Tier seine Amis gaga-mäßig auf,
wm Oschde nemmt Zar Putin mit seine Hormone no jede Leich' en Kauf.

Ä eklige Schlammschlacht hend se sich g'liefert dr Trump ond die Clinton,
dr Wahlkampf bei de Amis – da g'winnsch bloß no mit echt fiese Finten.

Vielleicht hätt mr die boide en so en TV-Container neistecke solle,
die Leit hättet boide rausg'wählt, aber wen hättet se stattdesse wolle?

Uff de Philippine lässt dr Staatschef uff bloßen Verdacht erschieße,
en Mexiko miaßet d' Leit seit Jahren literweis' ihre Träne vergieße.

In Syrien steht kaum no en Stoi uffm andere no druff,
Krankenhäuser, Kinder, Wehrlose? Awa! Emmr feschte puff-puff.

Omzingelt waret au in dr letztschte Silveschternacht
unvorbereitet viele Fraue en gierige Männermasse neikracht.

Wurdet belächligt, begrapscht ond um dr Menscheverstand brocht,
seitdem grassiert's Misstrau, die Volkseele schempft, bruddelt ond kocht.

Em Orient regiert faktisch wieder des gewissenlose Sultanat,
wenn über die oi Sultanine redsch, des isch wirklich en Spagat.

Dr Erdogan hat gar koin Humor, aber doch viel z'viel Macht,
ois kann er halt gar ned brauche: Ironie ond dass mr über ihn lacht.

Mir wolltet ned wiederhole des oine Gedicht
vom Böhmermann, onser aller neues Komiker-G'sicht.

Schonsch miaßet mr ons heit obend doch no entschuldige,
de'n mr liaber denne vergewaltigte Ziege onsern tierische Reschpekt kurz huldige.

Da siasch emol, lieber Schultes von onserm winzig kloine Benninge,
dass die Schmerzgrenz der Satire noch viel, viel weiter obe liege.

Was mir ons trauet ganz sanft ond e bissle frivol mol anzudeute,
däd ned mol bei dr Mainzer Fassenacht dr kleinschte Tusch bedeute

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

Doch zurück zum Erdogan ond dene andere schlimme Gewaltanwender,
se sorget dafür, dass au bei ons dr Anstand fällt hinter wortreiche Gewänder.

Über Soziale Netzwerk kannsch heit jeden Hass hemmungsfrei loswerde,
verfolgt wird kaum oinr, s'bleibt oft bei Achselzucke ond empörte Beschwerde.

Womit mr wäret bei denne geschichtsvergessene Saudomm-Schwätzer,
Frau von Plapperstorch, Gauland ond die andere kaltherzige Hetzer.

Säet bloß Hass und Streit, des isch ned wirklich opti-geil,
manche lasset sich angle wie en stomme Fisch, ruaft's bald: "Petry, Heil"?

Ond wenn mr schon beim dem liadriche Thema send:

Be-Ängschi-Gend isch, wenn mr se alle au bildlich erkennt.

Dr Trump, die Storche odr der holländische Wilders-Demagoge,
gucket Euch a die Frisura, scho alloi deshalb g'höret se ganz schnell verbote.

'S isch aber ned bloß selle Art von politischem Clown
auf die mr g'rad verstört ond verständnislos drauf schau'n.

Mit Horrorclown-Maske, aber ohne Hirn in dere Kugel uffm Hals
erschreckt d' Leit uff dr Gass, Herr, schmeiß' Hirn ra, oder e bissle en Schmalz.

Ned zu vergesse die Spezies der so genannten „Reichsbürger“,
denket glatt, se wäret omzingelt von historische Lügner.

Schikanieret arglose Beamte on schiaßet uff Polizischte,
den geischdige Dünnschiss sott mr ohne Umschweife sofort ausmischte.

Mr kann aber au ohne Ideologie gemeingefährlich sei,
Stichwort „Smombies“ oder des ständige Stiere, heidenei,

in des Smartphone zom poschte, snäpchatte oder whatsäppe,
beim Pokemon jage muasch guad uffpasse uff die ganze Wischdeng-Deppe.

Odr schwätzet mr emol über'd Zukunft der Versorgung, oh la la!
Über Freihandelswirtschaft, über TTIP on des andere da, des Cetata.

Des hört sich schon an wie schlechte Q-Tipps für mei undichte Proschtata,
wenigstens wisset mr jetzt: Wallonien isch fascht so stark wie Kanada.

Oder warum hat d' Regierung ons plötzlich zu Hamschterkäuf g'rate?
Hat sie selbscht ihre ond onsre Vorrät' genüsslich verbrate?

Ängschtlich send mir also los, um möglicht viel Waren abzugrase,
doch d'Hamschter waret ausverkauft, s'gab bloß no Meersaue und Langohrhase.

Eigentlich brauchts gar koin Spaltpilz von ganz weit auße,
mir Europäer d'en ons ja scho gern selbr gegenseitig zerzause.
Engländer machet aus em große bald a ganz kleins Britannien,
who knows: Schotte ond Nordire? Wandret vielleicht bald aus nach Spananien?
Hartherzige Ungarn ond andere osteuropäische Länder
send no ned lang dabei ond au ned wirklich große Spender.
Nemmet gern Geld für ihre wirtschaftliche Prosperität,
in Sache Flüchtlingsaufnahme mangelt's aber an jedweder Solidarität.
Angesichts dessen war's schon ziemlich verwegen
von Frau Merkel ond ihr'm von Brüssel mitgegebenen Segen.
Den Flüchtlingspakt mit dem Teufel von Ankara abzuschließen,
ob dr Erdogan sich dran hält? 'S isch längscht ned bewiesen.
Nur des Dilemma begleitet uns seit Jahren,
dass Menschen sich aufmachen trotz aller Gefahren,
vor Kriegen, Hunger und anderen Nöten wegflihen,
wer dort überlebt, muss aus seiner Heimat einfach wegziehen.
Bei ons in Benningen weiß man Menschlichkeit zu schätzen.
Tut mr sich trotz vieler Unterschiede gegenseitig ned verletzen.
„Wir schaffen das!“ isch machbar, dr Asylkreis zeigt's ons alle,
mr muaß sich ja ned immer aufgeile an einzelne Negativfälle.
I ben g'spannt ob des funktioniert mit dene Kommunikationen,
wenn aus dr „Krone“ wird a Zentrum mit Leut aus viele Natione.
Als Pfarrer sag i: Gehet no ond probieret's einfach mol aus,
a Schisha-Bar soll nei, ha, des wird's bestimmt a luschtig's Haus.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreib.

Grundsätzliches muss mr mol sage, wie schon vor einem Jahr,
ach, lieber Gott, 's raschelt schon onder mei'm große Talar.
Denn en onserm Flegga beginnt sich au e bissle was zu rege,
i will's ned beschreie, oh, des wär scho e bissle verwege.
Fanget mr an mit dem Baggerbiss hinter dr alte Gartestroß,
Aussegnungshalle ond Parplätz für Trauernde, ha!, des wird wirklich ganz groß!
Mir Jonge schreiet's raus vor lauter Begeischterung:
Olé Olé! Ortsbelebung durch Friedhofs-Erweiterung!
Weiter goht's mit dem geplante Areal om onser alte Kelter,
a schöne Piazza soll's werdä, i föhl mi plötzlich e klei's bissle älter.
Säh mi sitze beim Espresso ond emma luschtige Gaumekitzler,
koi Auto stört, koin Feinstaub wabert beim Uff-dr-Negger-blinzle.
Vorher muaß aber dr Verkehr komplett omg'leitet sei,
die Umgehungsstroß stockt scho wieder, was für a Bohai!
Im Moment steht a Fahrradbrücke ganz einsam und allein,
e Jahr länger muss se warte, natürlich Fehlplanung, wie soll's au andersch sein.

Ä baar Meter weiter henda, von ons dahanne aus g'säh
feiern unsere TSV-Kicker ä Johr voller Umtata-Täterä.
Erscht dr Klasse-Erhalt g'schafft mit wirklich großer Power,
zur Belohnung gibt's Kunscht statt Natur, nur des hilft auf Dauer.
Uff' em Kunschtrase könnent se sich in Zukunft ihre Haxe uffschürfa
um anschließend hochprozentige Schmerzmittel in sich reinzuschlürfe.
Koi Problem! Am Spielfeldrand steht au die nächscte fuffzich Johr
onser aller DRK. Ein „Hoch“! auf Euch, Ihr send halt emmr für uns do.
A paar Meter weiter in Richtung Freiberg weit drauße
gibt d' Firma Kurz onserm Hausmüll e vorübergehend's Zuhause.
Glei' zwei Mol brennt hat's, des Klomp, mir Leit waret ganz benomme,
deswäge isch Benningen wenigstens emol en dr Landesschau komme.
Wenn mr vom Kurz aus au no des kloine Waldstück durchlauft,
beschaulich liegt dort onser Weiher, wo em Mai öfters a Armada absauft.
Beim Fischersteche wird des Läba da dren en Tag lang ziemlich verwirrt
weil mr von de Storze, we jede's Johr, gnadenlos ens Wasser g'stoche wird.
Ond wenn mr grad von Benningens großer Sportlerdynastie redet
derf dr Storze-Ralf ned fehle, legt jeden Gegner uffs Kreuz bis der ihn anbetet.
Was sich en seiner Altersklasse zu ihm uff d'Matte nonder traut
wird vom Storze-Ralf deutschlandweit gnadenlos verhaut.
Sportlich semmer scho sehr dahanne en onserm kloine Benninge,
au mir Kirbebube de'n ons öfter mol zu Höchsch-Leischtunge uffschwenga.
Zum Beispiel beim Sommerbiathlon vom omtriabige hiesige Skifahrer-Club,
ens Ziel komme semmer, als 6. von 10, ihr diarfet jetzt ziage vor ons Euern Hut.
Des Vereinsläbe isch sowieso ebbes, wo mr richtig stolz druff send,
dr „Marktplatz der Vereine“ hat em Juni viele Bürger angelockt g'het.
Alloi dr Fischerverei hot en Haufe neie Mitglieder überzeugt ond kriagt,
achtet halt druff, dass die Fischbestand an onserer Anlände ned völlig versiegt.
Emmer no vakant ischs Pfarramt, s' dauert recht lang, echt schwer zu verstehen,
Frau Gabler sorgt dort aber nun vorübergehend fürs spirituelle Wohlergehen.
Guat goht's inzwische au viele Kinder und deren stolzen Mütter und Väter,
dr Hort an dr Schul' isch offe, die Boule-Bahn für die Alte kommt no halt später.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreib.

Mir kommet zom End', doch dürfet ois ganz g'wias ned verschweige,
dass Stuttgart abg'stiage isch, em Fuaßball den's alle grad voll vergeige.
Em Mai hat sich dr EmVau in sei'm no recht frische Grab mehrfach romdräht
weil sein VfB dr Abstieg nach viele Anläuf endlich optimal nobrocht hät.
Die Zwoite isch au gleich nonder ond die Kickers fallet g'rad henterher,
wie mr wieder nuffkommt, da de'n se sich anstelle ond s'isch halt sauschwer.
A positive Seite hat die Zweite Liga für onsern VfB trotz allem aber au,
mr spielt gege echte Tradition, die neureiche Klubs interessiert wirklich koi Sau.

Mol gucka ob dr neie Präsident den VfB-Tanker wieder end Fahrinne ziagt,
Dietrich hoißt er, omstritte isch er, ä dünne Mehrheit hat er bloß nokriagt.
D' Ausgliederung muss her, dr Cameron wär'n Experte, der kennt sich bei sowas aus,
aber als S21-Sprecher woiß Dietrich genau, wie mr Wahnsinnsprojekte
verkauft, oh Graus!

Was isch schonsch Wichtig's passiert, woraus wurde g'macht a große Schau?
Dr Jogi hat sich am Arsch kratzt ond dra g'roche vor Millione im TeVau!
Og'waschene Fußballstars könnet ned ohne Weiteres Europameischer werde,
guck dr Ronaldo an, der g'wennt breitbeinig, hat der dann ned au im Schritt Beschwerde?
Brangelina hend sich trennt ond stürzet sich jetzt en ihren Rosenkrieg,
Olympische Spiele: Die Pharmaindustrie eilte in Rio von Sieg zu Sieg.
Em Beckenbauer sei Denkmal isch hee, dui Lichtgestalt mit Lug und Trug,
doch i woiß, wenigstens mir Benninger bleibet verantwortungsvoll und klug.

Denn egal, was passiert, mir haltet scho zamma.

Weil mir Benninger send ond aus Benniga stamma.

So war's, so isch's und wird's au emmr so bleiba.

Kirbe isch Tradition, ons kann koiner vertreiba.

AMEN